

فريق التفريغ بموقع الطريق إلى الله

يقدم

من سلسلة "وقفات مع سورة العنكبوت"

الدرس 13

(باللهجة المصرية)

لفضيلة الشيخ: د/ حازم شومان

رابط المادة:

<http://way2allah.com/khotab-item-118559.htm>

السلام عليكم ورحمة الله وبركاته

الحمد لله و كفى وصلاة وسلاما على عبادة الذين اصطفى اللهم لك الحمد كله ولك الملك كله وببيدك الخير كله وإليك يرجع الأمر كله اللهم صلي على الحبيب محمد وعلى أزواجه أمهات المؤمنين وعلى ذريته وآل بيته إنك حميد مجيد أما بعد ...

اخواني واخواتي في الله يعنى طلبه وطالبات المعهد القرأني الدعوى سنة أولى وسنة ثانية واخوانا واخواتنا و شبابنا عموما على شبكة النت. ربنا يبارك فيكم ويحفظكم سواء على الغرفة الصوتية على موقع الطريق الى الله أو على البث المباشر على اليوتيوب ،معلش بقي نزلنا الرابط ليكم متأخر بس معلش ظروف خارجة عن ارادتنا اللهم لك الحمد . الحمد لله على قدر الله ، يعنى أحنا بنستأنف الوقتي تدبر في سورة العنكبوت وصلنا لقول الله سبحانه وتعالى " **وَلَا تُجَادِلُوا أَهْلَ الْكِتَابِ إِلَّا بِالَّتِي هِيَ أَحْسَنُ إِلَّا الَّذِينَ ظَلَمُوا مِنْهُمْ ۖ وَقُولُوا آمَنَّا بِالَّذِي أُنزِلَ إِلَيْنَا وَأَنْزَلَ إِلَيْكُمُ وَالْهَذَا وَاحِدٌ وَنَحْنُ لَهُ مُسْلِمُونَ** " آية (46)

بنستأنف الوقتي يعنى موسوعة مشاكل الملتزمين والملتزمات ،بنستأنف الوقتي الدورة اللي أحنا بدأناها بقالنا كذا شهر اللي هي خطوة أولى التزام ،اللي هي مشاكل الملتزمين والملتزمات، و اتكلمنا ف الحلقات اللي فاتت و الدروس اللي فاتت عن مشكلة معارضة الوالدين للالتزام ،عن مشكلة التهديدات في أمن الملتزم والملتزمة بسبب التزامهم و بسبب بيئة الإيمان وبسبب الشغل في الدعوة ،اتكلمنا عن الصحبة السوء و ازاي انها بتحاول ترجع الملتزم و الملتزمة للماضي بتاعهم، اتكلمنا عن عدة معوقات يا جماعة ، وبعد كذا اتكلمنا عن قصص الأنبياء الأداء البطولي في وسط نيران الفتن الرهيبة دي ،وبعد كذا اتكلمنا بعدما خلصنا الشوط بتاع قصص الأنبياء ، اللي خرجنا منه بآيه هي الحصون الحقيقية وايه هيا الحصون الوهمية؟ اللي هي " **مَثَلُ الَّذِينَ اتَّخَذُوا مِنْ دُونِ اللَّهِ أَوْلِيَاءَ كَمَثَلِ الْعَنْكَبُوتِ اتَّخَذَتْ بَيْتًا ۗ** " إن أهل الباطل امريكا واليهود وأذيانهم في الدول الإسلامية فاكرين إن الحصون بتاعتهم دي حصون بتحميهم من ربنا ،و ساعة ما بينزل أنتقام ربنا منهم بيعرفوا و بيدركوا و يتأكدوا إن يعنى إن كل الحصون اللي حوليهم دهيت خيوط عنكبوت ،كأنت بيت عنكبوت ،راح منهم كلهم و بعد كذا الحصون الحقيقية" **اتْلُ مَا أُوحِيَ إِلَيْكَ مِنَ الْكِتَابِ وَأَقِمِ الصَّلَاةَ ۗ إِنَّ الصَّلَاةَ تَنْهَىٰ عَنِ الْفَحْشَاءِ وَالْمُنْكَرِ ۗ وَلَذِكْرُ اللَّهِ أَكْبَرُ ۗ وَاللَّهُ يَعْلَمُ مَا تَصْنَعُونَ** " الصلاة و الذكر و القرآن دي الحصون الحقيقية اللي هيتحصن بيها هيأمن من عقوبات الدنيا و هيأمن من مصائب هذا و من مصائب يعنى الدنيا بإذن الله سبحانه وتعالى ،بعد ما ابصرنا و بعد ما شوفنا الحقيقة و بعد ما فهمنا إن أهل الباطل دول شوية عنكبوت وإن كل القوة الجبارة بتاعتهم اللي بيخوفوا أهل الحق بيها و اللي بيهددوا أهل الحق بيها.

ما هي إلا خيوط عنكبوت، وإن كل دول ربنا أنتقم منهم . كل دول اتكنسوا ف النهاية وإن اللي فضل .واللي نجا واللي أنتصر و اللي ارتفع واللي ربنا جبرهم و رفعهم هم أهل الطاعة وأهل الهدايه . بعد ما شوفنا حقيقة الباطل وإنهم شوية اقذار وإن هما شوية حقراء ،دخلنا بقي استئناف تاني

للفتن التي تقابل الملتزم الجديد، دخلنا تاني في قول الله سبحانه وتعالى " **وَلَا تُجَادِلُوا أَهْلَ الْكِتَابِ إِلَّا بِالَّتِي هِيَ أَحْسَنُ** " دي هنا بقى يا جماعة اسمها فتنة إيه؟ أو اسمها مشكلة إيه؟

" **الشبهات** " الشبهات و دي قضية خطيرة جدا قضية الشبهات قضية يعنى كنا فالأول بنقول معارضة الوالدين دي أو مثلا الصحبة السوء دي اسمها المعوقات الخارجية.. المعوقات الخارجية يعنى حاجة بتعوقك عن طريقك أو حاجة بتعوقك عن طريقك انما الوقتي أحنا بدأنا ندخل في المعوقات الداخلية

يعنى إيه المعوقات الداخلية؟

يعني لو قابلتوا الاخوة و الاخوات اللي وقعوا في مشاكل بسبب الشبهات دخل على موقع إحدى، دخلت على موقع ربوبى، دخل على موقع تنصيرى، دخلت على موقع علمانى ولقط شبهة، بتحسوا إن الأخ أو الأخت مدبوح، بتحسوا أن هو مدبوح ليه؟ لانه فعلا مدبوح في يقينه، بتحسوا إن هو الموت أسهل ليه من أن هو كان يصيب دينه شكوك، أو إنه يبقى عنده شكوك ف العقيدة أو إنه يبقى عنده شبهات ف اليقين اللي عنده شبهات في اليقين في وجود الله أو عندها شبهات ضد القرآن أو الإسلام أو الرسول عليه الصلاة السلام بيبقوا معذبين عذاب رهيب و عايشين في الأم رهيبة بيتمنوا لو كان قطعت ادين أو رجلين منهم لو كان خسروا اموالهم و شهاداتهم و مكنوش يبتلوا بالشك في العقيدة

فقضية التشكيك ف العقيدة دي قضية كارثية ليه؟

لان النجاة في الآخرة عايضة يقين، النجاة في الآخرة عايضة يقين، فالشكوك ف العقيدة يسبب الأم نفسية مهولة فهنا المعركة إيه بقى؟ " **وَلَا تُجَادِلُوا أَهْلَ الْكِتَابِ إِلَّا بِالَّتِي هِيَ أَحْسَنُ** " هنا يا جماعة المعركة مع أهل الكتاب، يعنى النص الأولانى من السورة كله مع المشركين، مع شوية مشركين شبهاتهم اصلا شبهات تعبانه، مش فاهمين اصلا بيقولوا إيه، شوية ناس بيسجدوا لهبل ومناة مش فاهمين حاجة، انما لما المسلمين كذا أنتقلوا للمدينة المنورة هيبدأو يجادلوا اليهود و النصرى فاليهود و النصرى مستوى الشبهات بتاعتهم بتاعة قسأوسة النصرى و أحبار اليهود مستوى على جدا، مستوى شبهات يعنى إيه خطير أنتوا شوفتوا بقى اسلام البحيرى وشوفتوا الشبهات بتاعته بقى بتاعة العلمانيين وشوفتوا الشبهات فالدين و العقيدة و شبهات الملحدين الوقتي بتبقى شبهات يعنى فعلا كثير من العوام ممكن يلبس عليهم دينهم فيها، بل فيه شباب ألد والعياذ بالله، بل فيه شباب و العياذ بالله تركوا الدين، واتبع أديان أخرى ليه؟ بسبب التشكيك ف العقيدة فده بيفهمنا

النقطة الأولى: يعنى قبل ما ندخل في قضية الشبهات والتشكيك في العقيدة وقبل ما ندخل فالعنوان بتاع درس الليلة يعنى **ردوا يا مشايخ لماذا يدخل أديسون النار؟** "ردوا يا مشايخ لماذا يدخل أديسون النار؟" ده العنوان اللي أنا اخترتة ل اللقاء بتاع اللية لماذا يدخل أديسون النار؟ أديسون يدخل النار ليه؟ و تلاقى الاخ واقف ويقول أديسون يدخل النار ليه؟ اه قولى اللي منورك النور اللي في السقف دلوقتى ده، اللي منورك بيتك اللي منور العالم كله الوقتي، اللي الكاميرا اللي بتصورك وأنت قاعد تبث الوقتي مباشر على اليوتيوب هو اللي عملك النور بتاع الكشافات بتاعتها، أنت عايز تقولى أن واحد مسلم عاش عادى ومعملش أى حاجة للانسانية ولا للبشرية يدخل الجنة واللى اخترع اختراعات واللى عمل الموبايل واللى عمل الانجازات العلمية واللى أخذوا نوبل يدخلوا النار و و و و مسلم معملش حاجة يدخل الجنة، واللى عملوا الحاجات دي

فردوا يا مشايخ لماذا يدخل أديسون النار؟ و ردولى بقى هو بيل جيتس اللي قاعد يصرف فلوسة في الأعمال الخيرية يدخل النار ليه؟ و الوليد بن طلال يعنى مبيصرفش فلوسة في هذة المجالات و بل ممكن يكون غير هذا أو بعيد عن هذا يدخل الجنة ليه؟ ردولى يا مشايخ بقى، تعالوا يا جماعة تعالوا أما نشوف لما الشبهات بتعلى بقى لما الشبهات بتعلى و الشباب بيبقى قاعد بيسمع طب صحيح طب الرد إيه؟ طب نعمل إيه؟ طب الناس يعنى الناس عايضة تفهم، الشاب أو الفتاة لما بيدخل

ف قلبة شكوك في عقيدته بيبقى عايش متعذب، تعالوا بقي قبل ما ندخل في هذه الكلمات وهذه الحرب الشعواء لأن أنا الوقتي باسقط الكلام ده على الواقع، وأهو الوقتي ربنا قالهم **"وَلَا تُجَادِلُوا أَهْلَ الْكِتَابِ إِلَّا بِالَّتِي هِيَ أَحْسَنُ"** أهل الكتاب دخوا في المعركة بقي، بقي حرب مباشرة شبهات، الشبهات تطورت جدا دخوا بالكلم الآيات دي نازلة قبل الهجرة للمدينة، يعنى قبل المجادلة مع أهل الكتاب اصلا، يعنى قبل ما الحدث ده يحصل، يعنى قبل ما أهل الكتاب يطلعوا شبهات في الكتاب والسنة الآيات دي نازلة لأن سورة العنكبوت من ضمن الأقوال أنها آخر سورة في مكة، يعنى تأهيل للهجرة

ربنا بيقولنا الكلام ده قبل ما نهاجر ليه؟

التأهيب قبل نزول الواقع دا منهج قرانى عظيم زى بالظبط كدا سورة مريم نازلة قبل هجرة الحبشة ليه؟ لأنها بتتكلم عن النصارى فالوقتى أنتوا هتهاجروا لبلد كلها نصارى وهتلاقوا ملك نصرانى اللي هو النجاشي فكانت بتأهل الصحابة للتعامل مع النصارى، هيا قصة اصحاب الكهف نازلة قبل هجرة الحبشة ليه؟ لأن الهجرة ديت محصلتش من أيام سيدنا ابراهيم فمفيش حد مستعد يهاجر عشان الدين، فربنا يجيب قصة شباب هاجروا وتركوا أوطانهم عشان دينهم، عشان يمهد الصحابة لقرار الهجرة اللي النبي عليه الصلاة والسلام هيكلفهم به للحبشة، بيبقى القرآن منهج عظيم يا جماعة القرآن بيمهد و القرآن بياهل، بيبقى لازم وأحنا عايزين ننزل الواقع ونشتغل ف الدعوة الى الله لازم نتأهل، عشان كدا أحنا بنشرح سورة العنكبوت ليه؟ الدورة اللي أحنا الوقتي يعنى شوفوا وصلنا للحلقة الكام فيها، بنشرح سورة العنكبوت ليه؟ عشان نتأهل، نتأهل يا جماعة للنزول للواقع عشان المشاكل اللي معذباكي، كل مشكلة من مشاكل سورة العنكبوت فاللى خدناه و اللي لسه هناخدها بإذن الله لحد نهاية السورة بإذن الله، كل مشكلة من دي سبب في أنتكاس الآف الملتزمين و الملتزمات، كل آية من آيات سورة العنكبوت عدد فقة الملتزمين الجدد و الملتزمات الجدد ليها سبب في ان ألوف مؤلفة من اللي دخلوا الطريق ده سبوة، عشان كدا سورة العنكبوت دي أنا بعتبرها أمن قومي للتيار الإسلامى، أمن قومي دي سورة تتحط في الصدر ده أمن قومي للتيار الإسلامى ليه؟ لأن بسبب عدم فقة سورة العنكبوت عدم تحصين الإخوة و الأخوات الجدد ضد مشاكل الطريق في بداية الطريق حصل أنتكاسات مرعبة مئات الآلاف بل ملايين، نص الشباب اللي ماشيين في الشارع و البنات المتبرجات التزموا في يوم من الأيام طب أنتكسوا ليه؟ يعنى أحنا عندنا عشرين ثلاثين مليون شاب التزموا في يوم من الأيام في مصر بس طب أنتكسوا ليه؟ أنتكسوا عشان محدش فهمهم سورة العنكبوت، محدش عالجلهم القضايا دي، فأحنا دلوقت في مشكلة من ضمن المشاكل الخطيرة

مشكلة الشبهات وحرب الشبهات الرهيبة، سعار الشهوات اللي على 28 قناة بتقدم 28 برنامج توك شو في وقت الذروة قاعدين يسمموا قلوب الناس، يسمموا عقائد الناس، والآف المواقع على النت من أجل تسميم قلوب الناس وتسميم عقول الناس، تسميم عقائد الناس

يبقى النقطة الأولى الآيات دي نزلت امتى؟ قبل الهجرة على طول للمدينة المنورة، بيبقى سورة العنكبوت يا اخوانا كده نصفين افهموا معايا الحجة دي لأنها خطيرة جدا، **سورة العنكبوت ذكر فيها**

هجرتين

الهجرة الأولى: في الآية 26 مع سيدنا ابراهيم وهو يقول **"وَقَالَ إِنِّي مُهَاجِرٌ إِلَى رَبِّي"**

الهجرة الثانية: العنكبوت - الآية 56 **"يَا عِبَادِيَ الَّذِينَ آمَنُوا إِنَّ أَرْضِي وَاسِعَةٌ فَإِيَّايَ فَاعْبُدُون"**

يبقى سورة العنكبوت فيها دعوة الى هجرتين، الكلام عن الهجرة مرتين، النصف الأول من سورة العنكبوت فيه الآية **"ووصينا الإنسان بوالديه"** اللي لما سعد بن أبي وقاص أسلم وأمه حلفت أنها لا تاكل ولا تشرب وهو مش عارف يعمل آيه فنزلت الآية أن البر مش أنك تسمع كلامها وترتد عن الإسلام

يبقى النصف الأول من سورة العنكبوت في شواهد أنه نزل في المرحلة الجهرية في الأول، يبقى النصف الثاني من سورة العنكبوت كلمة " **أهل الكتاب** " في شواهد قوية جدا من السياق أنه نزل في آخر مكة خالص قبل الهجرة

يبقى سورة العنكبوت نصفين كل نصف ذكر فيه هجرة ،الهجرة اللي في النصف الأول دي تمهيد لهجرة الحبشة ،الهجرة اللي في النصف الثاني اللي هي " **إِنَّ أَرْضِي وَاسِعَةٌ** " دي الهجرة للمدينة ،يبقى سورة العنكبوت هي السورة الوحيدة في القرآن التي تحدثت عن الهجرتين والتي شملت الهجرتين والتي تكلمت عن الهجرة مرتين عشان كذا اللفظ اللي جه ايه ؟ وقال اني سهاجر الي ربي ، لا " **وَقَالَ إِنِّي مُهَاجِرٌ إِلَى رَبِّي** " مهاجر مفاعل يعني ايه يعني أنا معدش ليه وطن أنا تخلت اي جنسية ليا واي أنتماء لاي ارض ليا أنا وطني هفضل الف الدنيا كلها واهاجر الف من بلد لبلد لحد ما الآقي البلد اللي أعرف أعبد فيها ربنا وأوصل فيها لربنا شوفوا سورة العنكبوت بتشكل علي أيه؟ يبقى سورة العنكبوت أمن قومي للتيار الاسلامي أمن قومي ليكي سورة العنكبوت دي إنقاذ لمصيرك من الأنتكاس لو خسرت التزامك مبتعوضوش مرة ثانية طول حياتك والحاجة الثانية سورة العنكبوت غير أنها أمن قومي للالتزام هي السورة التي حدثت عن الهجرتين الهجرة الأولنية كانت للحبشة والهجرة الثانية كانت التأهيل للهجرة الي المدينة المنورة ده علاقة الآيات بزمن السورة الحاجة الثانية ترابط الآيات مع السورة علاقة الآيات دي باللي فات ايه ،قلنا ان النص الأول للسورة بيتكلم عن الفتن الخارجية الوالدين ،صحبة السوء كذا النص الثاني بيتكلم عن الفتن الداخليه اللي هي بدأت من أول فتنة الشبهات ،النص الأولاني أتكلم شوية عن الشهوات " **اتَّبِعُوا سَبِيلَنَا وَنَحْمِلْ خَطَايَاكُمْ** " تعالي يا عم وعيش حياتك وعيش الحياة اللذيذة وبطل خناقة بقي ،انما النص الثاني بدا بالشبهات " **وَلَا تُجَادِلُوا أَهْلَ الْكِتَابِ** " طب الكلام عن الشهوات قبل

الشبهات ليه ؟ احد اخوانا شاف رؤية ان في مخرجة سنمائية مشهورة جدا مشهورة بالافلام القذرة وانها بتخرج أفلام يعني أيه فيه مشاهد قذرة جدا انهم ادوها جايزة حلم أنهم ادوها جايزة بيكرموها عشان جهودها بنشر الايدز وسط الشباب فكنا قاعدين مع بعض فيقول تاويل الرؤية دي أيه نشر الايدز فأنا كان تاويلي ليها أن الايدز ده مرض نقص المناعة فهي دايمًا بتتكلم عن المشاهد القذرة والمشاهد اللي فيها جنس وكذا فالحاجات دي بتنقص مناعة الشباب المناعة اللي هي العقيدة واليقين فيقوم الجيش بتاع الشبهات يبجو يدخلوا العالمانيين والملحدين والربوبيين والمنصرين يلاقوا مفيش مناعة يدو شبهتين الولد يلحد أو البنات تلحد والعياذ بالله فهمتوا بقي يا جماعة هي شغالة علي الشهوات أما بتمهد للشبهات فجه الشهوات قبل الشبهات ليه والله اعلم هنا لان فعلا الشغل علي الشهوات من اهل الباطل بيبقي الأول وبعد كذا لما الشباب خلاص المناعة بتاعته تضع والعقيدة بتاعته تبدأ تضع يبقى يضرب في الشبهات يبدا يضرب في الشبهات

عشان كذا ربنا بيقول " **وَلَا تُجَادِلُوا أَهْلَ الْكِتَابِ** " ولا تجادلوا الوأودي وأو الجماعة إنما لو جينا لآيه اللي قبلها " **وَاتْلُ** " بالمفرد " **مَا أَوْحَىٰ إِلَيْكَ** " **أَقِمِ الصَّلَاةَ** " بالمفرد ، الله يعني طب ودا بالمفرد ربنا كان بيكلم النبي بالمفرد في آيات العبادات قبلها ليه في الآية اللي قبلها أيه لان النبي هنا قائد والقائد لازم بيبقي قدوة فالقائد لو نفذ الصف مش هيمشي في ظروف صعبة زي زمن نزول سورة العنكبوت لو القائد قعد يديهم خط رناتة ومواعظ ممبرية رناتة لازم القائد بيبقي قدوة عملية في الواقع هو اللي ينزل المستشفيات والملاجئ وجولات في الشوارع ويضحى ويزهد لازم القائد بيبقي قدوة انما جه هنا الضمير بقي يا جماعة " **وَلَا تُجَادِلُوا أَهْلَ الْكِتَابِ** " ليه؟ لان الصحابة بدأوا يهاجروا اليهود استلموهم شبهات علي الجميع صار مهدد في العقيدة الجميع صار الحرج في عقيدته فمعناه ان بقي في حرب شعواء في هذه الفترة الحرجة وده هنا يا جماعة بيدخلنا غير الترابط اللي أحنا قلناه قبل كذا اللي هو بعد ما نورت بقي في الشوط اللي فات بدأنا ندخل في الفتن الداخلية وده هنا بيدلنا علي نقطة خطيرة جدا هندخل منها بقي للموضوع بتاعنا لماذا يدخل اهل السنة النار ردوا يا مشايخ هو عنوان الدرس مش لماذا يدخل اهل السنة النار عنوان الدرس

"ردوا يا مشايخ لماذا يدخل اهل السنة النار " لان المشايخ مبيحكموش علي معين مبيقولكش فلان الفلاني ده في النار هو أنا استغفر الله العظيم هو حد فينا ربنا ماسك مفتاح الجنة والنار باديه ودا الكلام اللي أحنا هنقوله دلوقتي وهنبدا نرد بأذن الله سبحانه وتعالى أو هنبدا نخرج كثيرا علي منهج الحرب بتاعت الشبهات ولكن الي أنا عايز اقله يا جماعة ان شوفوا السورة في الأول كانت نار في سورة العنكبوت نار وحرب شعواء علي التزام الملتزمين لما جينا للنهاية أول ما قربنا من المدينة المنورة كان متوقع بقي ان أحنا نروح نستريح نهاجر المدينة نلاقي النار زادت والشبهات زادت والمعركة بقيت اكثر يعني معناها ان هو ده الطريق كل ما بنجح كل ما الطريق بيصعب اكثر مش كل ما بنجح الطريق ببسهل اكثر كل ما بنجح كل ما أهل لباطل بيزدادوا شراسة اكثر وبيزدادوا توحش اكثر يعني سبحان الله العظيم حاجة عالية يعني صعب جدا أن أحنا ندرك أن الشبهات بتاعت أهل مكة كانت شبهات هايفة شبهات المدينة بقي شبهات مرعبة يبقى الشبهات احترافيه بقي ناس محترفة قساوسة وأخبار وحاجة بقي كذا أيه يعني ناس بطلع شبهات عميقة بقي هي متهافته برضو بس ممكن تخيل علي العوام اللي مش راسخين في العلم الشبهات خطافة عشان كذا علي الصراط الصراط له خطاطيف وكلايب الكلايب لمن تكالبت علي قلبه الشهوات والخطاطيف لمن خطف قلبه الشبهات والله اعلم يعني اللي خطف قلبه شبهات ده في خطر عظيم في دينه وفي خطر عظيم في العبور من علي الصراط والله اعلم فلازم ناخذ بالناس يا جماعة هما يعني سبحان الله العظيم يعني شوفوا ربنا بيقوله " **وَلَا تَجَادِلُوا أَهْلَ الْكِتَابِ إِلَّا بِالَّتِي هِيَ أَحْسَنُ** " مش بالحسن بالتي هي احسن؟ المؤمن ده لازم يبقي احسن شئ لازم يبقي احسن انسان في الدنيا احسن أخلاق في الدنيا احسن تعامل في الدنيا أرقي تعامل في الدنيا رغم الأتون والفرن اللي المسلمين فيه يعني بييجوا سبحان الله العظيم الشباب دلوقتي معرض لكمية شبهات مهولة هيلاقياها من الملحدين ولا من المنصرين ولا مين يعني سبحان الله لما سافرت أو غاندا في الرحلة الدعوية بفضل ومنة الله مع الشيخ وحيد عبد السلام بالي ربنا يحفظهم منظمة آفاق المستقل وبدأنا نتكلم مع النصاري ونتكلم مع القساوسة هناك الواقع مفتوح شوية في الفكر يا جماعة بسبب الفقر الناس مش مشغولة في الدنيا يعني ايه؟ يعني هناك الناس فاضية ليه؟ لان اصلا الناس فقيرة جدا ومجالات الشغل يعني قليلة جدا فبتلاقي اصلا الناس ايه يعني ممكن تلاقي كذا عادي أنت قاعد تتناقش مع قساوسة وتتناقش مع الناس وتتناقش في الشوارع لقينا ان القساوسة ممكن يسلموا بكل سهولة بكل سهولة قساوسة في الكنيسة ببسلموا تلاقي قسيس بيتكلم ويسلم تلاقي ناس متعصبة جدا للنصرانية وأسلمت أتعلمت في أو غاندا ان الاسلام ده دين قوي يا جماعة أتعلمت ان الاسلام ده لما نزلت في محك عملي حقيقي يعني أنا طول عمري ارد عن الاسلام في الدروس إنما أي أفق مع قسيس أتناقش معاه واتكلم معاه ويبقي في قساوسه حاضرين لينا في اللقاءات اللي بنتكلم فيها وتلاقي قساوسة تسلم وتلاقي ناس تسلم وتلاقي ناس متعصبة تسلم حسيت أن فعلا كل الاديان سوي الاسلام أديان متهافته جدا . أنا فاكّر مرة كنا بنتكلم طب ليه الصلب طب أنتوا بتقولوا ان سيدنا عيسى صلب تعالي الله عما يقولون علوا كبير ويعني تنزه أنبياء الله عن ذلك فبتقولوا سيدنا عيسى صلب طب صلب ليه؟ صلب عشان يكفر خطيئة آدم طب متكفر بأستغفر الله العظيم وأتوب اليه طب ما يصلي ركعتين توبة زي ما الاسلام علمنا طب ما نتوب " **غَافِرِ الذَّنْبِ وَقَابِلِ التَّوْبِ** " لا منتوش فاهمين، مش فاهمين ايه؟ مينفعش الاعمال الصالحة تخلي الانسان نضيف وظاهر الانسان انسان قدر ونجس، أنتوا بتقولوا ايه؟ هو كذا هما بيقولوا كذا الانسان نجس ولا يظهره شئ أبدأ لو واحد قعد في الجامع من يوم ما اتولد لحد ما مات مبطلش تسبيح مبطلش عبادة مبطلش صيام منمش لحظة من العبادة هيعيش نجس ويموت نجس، ليه؟ عشان خطيئة آدم، وأنا مالي يا عم، ابويا اخطأ أنا اشيل الذنب، ابويا اخطأ وتاب . مفيش الكلام ده خطيئة ادم خلت كل البشرية والعياذ بالله خلت كل البشرية نجس والعياذ بالله يحمل النجاسة والقدارة ومينفعش غير انه يهلك، طب ليه شوفوا بقي الفرق بين الاسلام والاديان الاخرى الاسلام فيه اسم الله البر " **إِنَّهُ هُوَ**

الْبِرُّ الرَّحِيمُ " البر اللي بيظهرك بالاعمال الصالحة مش لازم يطهرني بدم ابنه استغفر الله العظيم طب خلاص طب أنتوا مينفعش طب الحل ايه بقي؟ الحل ان ربنا ينزل ابنه فابنه يتصلب فيقوم يكفر خطيئة البشر طب بالله عليكم أحنا بنكلم عاقلين ولا بنكلم مين بالظبط؟ طيب هو ابنه نزل عشان؟ خلونا ابنه نزل عشان يكفر خطيئة البشر، طب يكفر خطيئة البشر اللي فاتوا؟ اه البشر اللي فات كدا اتغفرله. طب ماهييجي بشر بعد ما ابنه يترفع تاني يذنبوا هو ابن الله بقي قاعد في السما وظيفته ان كل ما البشر يذنبوا ينزل يتصلب يعني وظيفته كدا ان هو كل ما يذنبوا انزل بقي اتصلب تاني انزل بقي اتصلب تاني، طب خرينا بقي نصنا عاقل ونصنا عاقل طب ليه انه اتصلب عشان خطيئة ادم طب ابنه ماله بخطيئة ادم لا ما هو خطيئة ادم مش هتتكفر لا اما ابنه يتصلب يعني أنا الوقتي واحد صاحب مصنع وشغال عندي مية موظف مية عامل ففي موظف غلني وحرقتي دمي وخلاقي هتجنن خلاص ودني بطلع دخان من كتر ما هتجنن منه قمت سايب المصنع وقمت رايح بيتي وقلت لمراتي هتيلي الوله هاتيلي ابني ضنايا الوحيد عايزة ليه؟ هاتيلي الولد وقمت جايب سكينه من المصنع وقمت دابح ابني وفاصل رقبتة عن جسمه فالناس كلها هتجنن أنت بتعمل ايه أنت بتدبح ابنك ليه اقولهم اصل الموظف اللي في المصنع غلني واخطأ في حقي وأنا مش هسامح الموظف اللي في المصنع الا لما ادبح ابني بالله عليكم الناس تقول عليا ايه؟ الناس تقول علي اللي بيعمل كدا ايه؟ مجنون؟ مجنون مين؟ اذا كان مفيش بشر ينفع يعمل كدا، ينسب ده لاله ازاي؟ واحد اغضب ربنا خلونا نمشي بعقل واحد عمل معصية ربنا يقتل ابنه ليه؟ ربنا يسبح دم ابن استغفر الله العظيم تعالي الله عما يقولون ابن الله ليه؟ هو ماله، هو ماله يبقي يعني كلام متهافت ثم هو ربنا يبقي له ابن واحد ليه طب ربنا لو بيحب الولاد ما ربنا كان يبقي له بقي مليارات الولاد هو اشمعني واحد اشمعني يعني كلام يا اخوانا هناك في أوغاندا اكتشفت ان فعلا الاسلام ده قوي اد ايه العقيدة بتاعتنا واضحة اد ايه ومنيرة اد ايه منورة الدنيا اد ايه؟ الملحدن تيجي تسمع كلام الملحدن كلامهم في الأول يخوف فعلا كلامهم في الأول يخضك.

ايه ده يقولك هو أنتوا بتقولوا ايه؟ هو ربنا عندكم استغفر الله العظيم بيدخل نفسه في كل حاجة ليه؟؟ استغفر الله العظيم أحنا بنقول الكلام ده بس عشان نوضح، هو ماله بورق الشجر اللي بيقع! ولو المطر نزل يبقي ربنا اللي نزله، ولو المطر وقف يبقي ربنا اللي وقفه، أنتوا بتدخلوا الإله بتاعكم في التفاصيل الصغيرة دي ليه، عارفين العلماني اللي كان بيقول مال ربنا ومال السياسة! استغفر الله العظيم ماهو الموضوع بيتطور بقي، هو أصلا دي بداية كفر مش انشقاقات اجتماعية أو حاجة هو مقتنع بيها، ربنا قال **"وَاتَّبِعِ الَّذِينَ ظَلَمُوا مَا أَتَرَفُوا فِيهِ"** مش ما اقتنعوا بيه، ده هو زي ما هقولكم دلوقت في النهاية هيقول "بص يا عم هتجيبني يمين هتجيبني شمال أنا حياتي دلوقت كلها نساء، كلها خمر كلها سهرات كلها زنا وكل اللي نفسي فيه وأنت قاعد تصلي وتصوم وخانقلي نفسك" هو عارفين في الآخر عايز يوصل لإيه؟ أنا مترف كده أنا بعمل اللي أنا عايزه، أنتوا بتدخلوا الإله بتاعكم في كل حاجة ليه؟ هو الإله بتاعكم بيدخل نفسه في كل حاجة ليه؟؟ هو يعني ايه كل حاجة؟

هو ايه مقياس الصغير من الكبير عندك؟ هو ايه اصغر حاجة في الدنيا؟ ذبابة مثلا؟ أنت تعرف إن الذبابة دي ممكن تغير مستقبل البشرية كلها؟ إزاي بقي يا عم! هو مين اللي قتل النمرود؟ ذبابة، اللي قتل النمرود ذبابة، هو مين اللي هد سد مأرب؟ وقضى على الحضارة اللي كانت موجودة؟ فئران شوية فئران، هو مين تاريخيا اللي قتل الإسكندر الأكبر؟ الإسكندر بقي شخصا حته بعوضة، في أوغاندا الواحد اتعلم إن نموسة ممكن تقتل أي بني آدم بسهولة جدا، نموسة صغيرة جدا حاملة الملاريا ممكن يكون حاكم دولة، يبقى مين اللي قالك دي صغيرة؟ دي وجهة نظرك أنت لكن أنت متعرفش أنت متقدرش تحكم على الأمور، طيب ياعم طيب أنت بتقولني أديسون يدخل النار ليه؟ بيل جيتس يدخل النار ليه؟ والوليد ابن طلال اللي مبصرفش فلوسة في الخير زي بيل جيتس يدخل الجنة ليه؟ هو أول حاجة أنت مش عارف يعني ايه لا إله إلا الله، أنت مش عارف يعني ايه كلمة

الله، أنت مش عارف قيمة انسان معاه لا إله إلا الله وانسان مش معاه لا إله إلا الله ،تاني حاجة مفيش حاجة اسمها أديسون يدخل النار ، هي الجنة والنار في ادينا؟ أحنا مش بنحكم على حد معين، أحنا بنحكم على الكافر والمسلم، اسمه الكافر والمسلم ،ممكن تتكلم على شخص قبل ما يموت بدقيقة يقول لا إله إلا الله ،على البالتوك حادثة واقعية مشهورة واحد عنده 80 سنة نصراني دخل وبدأ يتكلم مع الشباب وفي الليلة دي اقتنع بالاسلام وقال لا إله إلا الله ومات على البالتوك وأهله دخلوا عليه لقيوه ميت ، أهو أهله ميعرفوش إنه قال لا إله إلا الله ، وخذوه ودفنوه على النصرانية، أنت تعرف منين ياعم ، أنت تعرف منين ، واحد من القساوسة- وده حديث عيان شاهد عيان -واحد معدي من قدام بيته وكان الباب موارب قليلا لقيه بيصلي! ، وواحد تاني قسيس شافه بيتوضي !، أنت تعرف منين ؟ أحنا منحكمش على فلان وعلان، امال اسمها ايه؟ مسلم وكافر تاني حاجة مين قالك الوليد ابن طلال يدخل الجنة؟ هو أنت بتدخل بمزاجك وتخرج بمزاجك؟ المسلم لو عصى الله ربنا بيعاقبه بمعصيته الا أن يتوب ويتوب الله سبحانه وتعالى عليه ،والرسول صلى الله عليه وسلم يقول **"إن العبد ليلقي بالكلمة لا يلقي لها بالا تهوي به في النار سبعين خريفا"** ده مسلم وقال كلمة أو طلع إشاعة على مسلم ، مين قال إن المسلم العاصي مبيتعاقبش، مين قال إن طالما مسلم يزني ويقتل ويعمل ووو ، مين اللي قال الكلام اللغظة ده ،فين ده ،دي ناس مش عارفه حاجة عن الدين ، صلى الله عليه وسلم - قال: **"يُجاء بالرجل يوم القيامة، فيُلقي في النار، فتندلق أفتابه في النار، فيدور كما يدور الحمار برحاه، فيجتمع أهل النار عليه، فيقولون: أي فلان، ما شأنك أليس كنت تأمرنا بالمعروف وتنهأنا عن المنكر؟ قال: كنت آمركم بالمعروف ولا آتية، وأنهاكم عن المنكر وآتية"** ده كان راجل مسلم راجل واعظ كمان، ربنا يحفظنا كان راجل داعية ولكن كان مبيعلمش اللي هو بيقله ،أهو دخل النار أهو، مين اللي قالك أهو اتعذب بذنوبه لكن لو معاه لا إله إلا الله هيخرج من النار بهذا، لكن مين اللي قالك مش هيتعذب بالمعصية اللي عملها ،أول من تسعر بهم النار مين؟ الرسول صلى الله عليه وسلم - قال أول من تسعر بهم النار مين؟ الكافر الفلاني؟ المخترع الكافر الفلاني؟ لأ عالم ومجاهد ومنفق ،يعني ناس مسلمين ولكن مرانين ،أول من تسعر بهم النار يبقوا وقود جهنم والعياذ بالله ، يبقوا وقود في جهنم والعياذ بالله ،يبقى مين اللي قال النظرة دي؟ ثم تعال هنا ومتقلّيش بيل جيتس وأديسون ،قولي كافر ومسلم ،ثم تعال يا عم أديسون نفسه اللي اخترع المصباح الكهربائي، لو بعد ما اخترع المصباح ونور الدنيا واحد بيقول لواحد أديسون اللي اخترع المصباح قاله مين أديسون ده؟ مفيش حاجة اسمها أديسون المصباح ده اتعمل لوحدته وأنكر اللي عمله أديسون ،يبقى مجرم في حقه أد ايه؟؟ يبقى الواحد اللي بيقولك مين اللي قال إن الشمس اللي عملها ربنا والقمر اللي عمله ربنا ده يبقى مجرم أد ايه؟؟؟ يبقى أجرم أد ايه؟ الواحد في القبر لما يتقاله من ربك فيقول ها؟ ها؟ لا أدري ،زي واحد ابوه اتجوز والدته ، وأبوه كان سبب انه اتولد وسبب وجوده في الحياة وأبوه احتفى بيه وفضل 30 سنة لغاية ما الشاب ده بقى عنده 30 سنة يطفح الدم عشان يأكله 3 مرات في اليوم ويشربه ويلبسه ويدخله أحسن تعليم وطفح الدم طول العمر عشانه ودخله أحسن جامعة وجوزه أحسن جوازة ودخله أحسن شقه وجابله أحسن فرش وأفخم عربية وشغله في أحسن شركة ،فالواد ماشي في الطريق فواحد بيقله هو أبوك اسمه ايه؟ قال إبيبيه! معرفش ايه !أبويا !! أنا مليش أب، يبقى ده يستاهل ايه؟ أهي دي ها؟ ها؟ لا أدري ، ها؟ ها؟ لا تدري اللي لحم اکتافك من خيره ،اللي موكلك ومشربك ومعيشك وسبب وجودك وفي الآخر تنكر وجوده؟ ها؟ ها؟ لا أدري، ايه يعني لما تخترع المصباح الكهربائي وربنا يدك البصر وانت تقول إنه أعمى نهارا وربنا يعطيك العقل وأنت تقول إنه يعبث وليس عنده حكمة في مقاديره ،وربنا يعطيك الحياة وأنت تنكر وجوده ،ايه يعني لما تخترع المصباح الكهربائي ما تخترع اللي تخترعه وأنت في الآخر ربنا بيعطيك النعم وأنت بتنسبها لغيره ثم دلوقت الموبايل ده هو أنت عملته عشان ربنا؟ اللي عمله قال يارب أنا عايز الأجر منك ولا عمله عشان الشهرة والمجد أو عشان العائد المادي أو عشان هو بيحب الشيء ده أو ..هو عمله عشان

ربنا؟ لو عمله عشان ربنا أجره هياخده من ربنا لكن هو معمولوش عشان ربنا ، هو عمله عشان الدنيا ثم هناك فرق بين واحد عمل حاجة كويسة والدين ،بين حسن السير والسلوك والدين، الدين حاجة وحسن السير والسلوك ده حاجة تانية ، إن واحد معاه معاه لا إله إلا الله غير واحد معاه حسن سير وسلوك وهو أول واحد بييجني الثمرة بتاعتها في الدنيا ليه كافر يعصي ربنا 50 سنة يخلد في جهنم ؟

أنت هتوهنا ليه؟ أنت دخلتنا في قصص ليه استنى بس أنا مش قصدي كده، أومال أنت قصدك ايه؟ ليه كافر يعصي ربنا 50 سنة يخلد في جهنم ؟ طيب ما يدخل النار 50 سنة ويخرج؟؟ وليه مسلم يطبع ربنا ويخلد في الجنة؟ سيبك من المسلم هتقول ربنا بيعامله بكرمه، ليه كافر يعصي ربنا 50 سنة يخلد في جهنم ؟

*ربنا سبحانه وتعالى يقول "**ولو ردوا لعادوا لما نهوا عنه**" ، إن القضية مش قضية 50 سنة، القضية إن هذا الكافر لو كان عاش مليون سنة كان برده عاشهم على الكفر وكان أصر على الكفر، هو مش جريمته ال 50 سنة، جريمته الإصرار على الكفر واعتقاد الكفر في قلبه، ولو كان عاش مليار سنة كان صمم على الكفر، فالجريمة هنا لو كان فضل عايش في الدنيا أو خلد في الدنيا كان برده عاشهم على الكفر وفضل على الكفر، يبقى القضية هنا الجريمة اللي جواه مش جريمة من اللي جوارحه عملتها، لأ دي الجريمة اللي قلبه عملها

طيب ايه الدليل إن القرآن ده من عند ربنا أصلا؟ وايه الدليل على وجود الله أصلا؟ ياعم أنت بتكلمني عن إله

أومال مين اللي خلق الكون اللي حوالينا ده ! ومين صنع كل اللي حوالينا ده ! أومال مين اللي علم فراشة المينارك اللي عايشة في أمريكا انها تهاجر كل سنة في معاد واحد؟ في معاد اليوم اللي بيتساوى فيه الليل مع النهار ، أنا عدت 40 سنة أنا أول يوم في حياتي اعرف ان فيه يوم في السنة بيتساوى فيه الليل والنهار غير قريب، مين الي علم الفراشة دي بقا الي ملهاش عقل ولا ليها بتاع ولا ليها أي حاجة خالص مين الي علمها أنا تهاجر بس فالיום الي الليل والنهار ده بيبقي 12 ساعة وده بيبقي 12 ساعة، فالיום ده تبدأ رحلة هجرة أربع سنوات عملتها ازاى وعرفتھا ازاى والي بيهاجر ده وميرجعش للمكان تاني بيموت طيب الناس الي بتهاجر دي عرفت الطريق تاني ازاى؟ !والطيور دي عرفت الطريق تاني ازاى ! واللي علم يعني بعض أنواع الحيتان في البحار والأسماك في البحار ان فيه نبات بيدأوي الجراح لما تتجرح تيجي تقعد تحك جسمها فيه علشان تتدوا كأنها بتدهن مرهم ..ومين الي علم أحد الطيور بيتغذي علي بيض كائن معين ..ان هو مش عارف يجيب البيضة أن هو يقوم جايب حجر في رجليه ويطير لحد ما يعرف ينشطن علي البيضة من فوق يقوم موقع الحجر علي البيضة كسرها وينزل يأكل اللي جواها مين الي علم !ومين الي علم الطيور لما تهاجر انها تمشي في شكل ال 8مين الي علمها تمشي في شكل هندسي الي بيقضي علي مقاومة الهواء مين الي علمها ! وأن لو فيه طائر من السرب تعب معرفشي يهاجر يفضل يفصل طب ما هو هيموت يقوم 2 كمان يفصلو معاه لحد أما يقدر يكمل ويواصل وينضم للسرب تاني ومين الي علمهم أن القائد لأنه بيتعرض لمقاومة الهواء كلها مينفعشي ياخذ الرحلة كلها في الأول الي هو رأس ال 8 فكل شوية يرجع ويتقدم قائد تاني والقائد التاني يرجع ويتقدم قائد تالت ومين الي علمها ..مين الي علم يا اخوانا مين الي علم مين الي هدي ...سيدنا موسي قالها لفرعون "**الذي أعطي كل شئ خلقه ثم هدي**" الهداية اللي فالكانات الي ملهاش عقل دي جابتها منين و عملتها ازاى ومين الي هداها ولو كان زي ما بتقولوا تطور أول جيل لو مكش عارف المعلومة دي فهذا الكائن كان مات طب أنت الوقتي بتقولنا القران والدليل علي ان القران ده بتاع ربنا القران اللي أنتوا عامالين تشرحوه ده الدليل ؟ يا عم ما تقرا القران ده وأنت تعرف ،ما تعرف يا عم القران ده من عند مين؟ هو الوقتي اللي يبص للاهرامات واجي اقوله يا عم دا اللي بني الاهرامات دي كان واحد مكسح اصلا وعنده كساح وعنده شلل اطفال هيقولي يا عم أنت

مجنون يا عم اللي بنى الاهرامات دول جبابرة هو اللي يعرف يعمل دي؟ ولا مثلا الموبايل اقله يا عم دا الي اخترع الموبايل ده واحد غبي دا ما بيفهمش حاجة هيقولي يا عم أنت اللي غبي دا عبقرى دا ما بعد العبقرية بمراحل ولا اجي علي الاب توب مثلا وواحد يقولي دا اللي عمل الاب دا ... ،دا مينفعش الصنعة تدل علي الصانع الكلام بيدل علي قائله هو لو دكتور زويل اتكلم في الفيزيا هيبجي واحد يقولي دا مبيعرفش يشرح فيزياء يا عم أنت اللي مبتفهمش ،يبقي الكلام يدل علي قائله ما تقرا كلام ربنا وتشوف ،أنا فاكسر سبحان الله العظيم لما كنا في كلية طب ويعني بدأت أعرف آيات الأجنة الآيات بتاعت الأجنة الإعجاز العلمي في آيات الإجنة طلعت مكتبة الكلية جبت مرجع من مكتبة كلية طب جامعة المنصورة يعني دا ده بايدي وصورت الكلام بنفسى جبت مرجع لرئيس قسم التشريخ في جامعة من جامعات كندا اسمه كسمور ،جبت المرجع بتاعه من المكتبة لا أنا ، هما بيقولوا الكلام ده في الشرايط بتاعت الاعجاز العلمي في القران قلت لا اشوف بنفسى بقي قلت اتأكد بنفسى اشوف الكلام ده فين والعالم ده فين والمرجع ده فعلا موجود في كلية طب ولا لا ،طلعت لقيت المرجع موجود في الكلية عندنا ولقيت والله يا اخواني مقدمة المرجع والله العالم كسمورد اهو العالم ده عامل مقدمة المرجع شرح لآيات الأجنة اللي هي في أول سورة الحج وفي أول سورة المؤمنون شارح آيات الاجنة بالعربي وشارح النطفة والعلقة شارحها بالعربي والانجليزي هذا العالم الكندي يعني مين اللي قال الكلام ده ومين اللي علم النبي عليه الصلاة والسلام الكلام ده مين؟ ومين اللي يقدر يقول الكلام مين؟ **" وَمَا تَسْقُطُ مِنْ وَرَقَةٍ إِلَّا يَعْلَمُهَا "** في حد يقدر يقول ده عن ربنا؟ يعني لو أنا عايز يعني أنا واحد يا عم عايز أألف كلام أنا اعرف ألف الكلام ده علي ربنا؟ دا هذا كلام لا يقوله عن الله الا الله سبحانه وتعالى ،زي ما ربنا يقول **" وَمَا يَعْزُبُ عَنْ رَبِّكَ مِنْ مِثْقَالِ ذَرَّةٍ "** هو حد يبجي في دماغه المعنى ده اصلا؟ ان مفيش ذرة في الكون تقدر تنفصل عن الله أو تستغني عن الله أو تغيب عن عين الله ،التصور ده يبجي في دماغ مين؟ دا فوق مستوي تفكير البشر ويعني قضية ان أحنا طب يا عم أنتوا دلوقتوا خلينا في الاخلاق ،المرأة أنتوا عندكوا ظالمين الستات وتقولي مش عارف ايه ،والستات وضعها مظلوم يا عم مين قالك ان الست عندنا وضعها مظلوم؟ الست عندنا أعظم وضع المرأة في جميع الانظمة الدنيوية الدينية والعلمانية هو وضع المرأة في الاسلام وأكبر معدل لدخول الاسلام علي مستوي القرى الارضية سواء في الغرب في البرازيل في المانيا في امريكا هو النساء في اسرائيل نفسها في اليهود نفسها في فلسطين المحتلة اكبر معدل دخول علي مستوي الكرة الارضية النساء اكثر ناس بيدخلوا الاسلام النساء ، اكثر من الرجال ،الاسلام بيدي للمرأة ذمة مستقلة في الهند اللي بيدفع المهر الست يعني أنتي لو كنتي هدية كنتي أنتي اللي تدفعي المهر ،في الغرب لو الرجل دخل كزينوا هو ومراته شربوا كوابيتين لمون بتحاسب علي كبايتها بتدفع نص فتورة التليفون لو اطلقوا هي اللي ممكن تدفع المؤخر مش هو اللي يدفع هي اللي تدفع له المستحقات المادية الست ممكن تدفعها في الغرب عادي يعني الدنيا هناك ههههه، أنتي هنا ذمة مادية مستقلة لو بتكسبي مليون جنيه في الشهر تعيني فلوسك وجوزك اللي يجب عليه ان هو يصرف عليك وجوزك اللي ينفق عليك يعني أحنا عندنا قضية الاسلام ثم يعني أحنا ممكن يكون واحد وشه أبيض وعنده حسنة في وشه ،الحسنة دي سموها حسنة لان هي بتزود حسن الوش طب لو كأتت الكاميرا متسلطة علي الحسنة والشاشة كلها بقيت سودا هيتهى للي بيبيص ان الشاشة قبيحة انما لو بصيت للحسنة جوا الوش هتعرف انها بتزود الحسن بتاع الوش يبقي الاحكام مابتتاخذش كذا متقليش الورث بتاع المرأه نص الرجل لان في تسع حالات المرأة بتاخذ فلوس اكثر من راجل ،الورث ده مئات الحالات ،هو أنتوا خدتوا حكم واحد وعممتوه في حالات كتير جدا في المواريث الست بتاخذ اكثر من راجل يبقي متخديش نقطة وتحطلي العدسه عليها هاتلي الوش كله علي بعضه هاتلي النظام الاقتصادي اللي في الاسلام علي بعضه هاتلي النظام الاجتماعي في الاسلام علي بعضه هاتلي النظام التشريعي في الاسلام علي بعضه يعني قضية الشبهات **" وَلَا تَجَادِلُوا أَهْلَ الْكِتَابِ "**

الشبهات بقيت رهيبة يا جماعة ، الشبهات بقيت فعلا أبتكار وأهل الدين محتاجين أن هما فعلا يقاوموا هذه الشبهات ، بس يقوموا ازاي بالطريق السليم مش بالرد عليها ، علي فكرة الرد علي الشبهات مش هو الحل ، ليه ؟ ساب الشبهات كلهم وفي الآخر يبجي يفلك ايه بص يا عم اقعدوا أنتوا بقي في اللي أنتوا فيه، أحنا قاعدين ما بين الزنا وما بين الخمر هو بيتكلم علي راحته وما بين اجمل نساء وما بين وأنت قاعد وسطهم وتصلي وتعتكف وخائق نفسك ماشي يا عم كل اللي أنت وقعت فيه في الزنا والخمر أنت دلوقتي عندك لذة معينة فيه راحت اللذة وأنتهت وهتموت وهتبقى شوية تراب وجسمك هيعفن أنت بتتباهي بايه ؟ يعني لو مفيش آخره دا بقي يعني من باب ايه " **قُلْ إِنْ كَانَ لِلرَّحْمَنِ وَلَدٌ** " يعني لو مفيش آخره منتش أحسن مني في حاجة بالعكس أنت بتزني وبتشرب خمرة وعائش معذب وبتشرب مخدرات علشان تهرب من الشقاء اللي أنت فيه ، أنا يا عم بصلي وبصوم ودي لابسه نقاب وعائشة أسعد واحده في الدنيا وبتضحك، أنت هتموت شاكك وهتموت معذب وهتموت وأنت قلبك محروق وأنا هموت وأنا سعيد وبضحك دا أنا بقولك لو مفيش آخره يعني لو مفيش آخره سعدتك أنك تبقي متدين وراحتك النفسية أنك تبقي متدين والايه رموز الاحاد في الآخر بينتحروا ليه في النهاية بينتحروا ليه رموز الاحاد سواء في مصر أو علي مستوي العالم بينتحروا مش قادر يقاوم الالم النفسي اللي هو فيه مش قادر يقاوم العذاب النفسي اللي هو فيه فالمعصية اللي أنت بتتنطت عليها دي وهم اصلا " **وَالَّذِينَ كَفَرُوا أَعْمَالُهُمْ كَسَرَابٍ** " دي سراب من التسرب والسرب اللي هو حاجة كل ما تجري عليها تجري منك فهو بيجري علي المعصية فإكر انه هيجيب منها لذة يلاقيها بتجري منه مش هيكتشف انها كأتت وهم غير اما يموت لو السراب واقف في مكانه كان اكتشف انه سراب بعد شوية انما هو مبيكتشفش علشان كذا سمي سراب لانه بيفضل يخدعك بتسربه من بين اديك لحد ما تموت وأنت منتاش عارف انه كان سراب وانك بتجري وراء سراب ، يعني قضية خطيرة جدا قضية الشبهات الرهيبه اللي أحنا عائشين فيها يا جماعة يا اخوانا الشباب دلوقتي عائشين في فرن الشبهات يعني أنا بقولكم مجموعة من الشبهات وكان نفسي ارد علي شبهات كتير ونمسك شبهات من ديت ونبدأ نسترسل فيها أنما للاسف الشديد دا بقي حرب مسعورة كان ناس الدين الاسلامي ده اكبر دليل علي انه الدين الحق ان كل الشبهات دي من الف واربعمانه سنة ليل نهار متواصل من أول " **وَلَا تُجَادِلُوا أَهْلَ الْكِتَابِ إِلَّا بِالَّتِي هِيَ أَحْسَنُ** " والدين ده موقعش دا النصرانية في أوروبا مستحملتش خمس ست كتب العلمانيين نزلوها فيها كتاب صخرة الحق وكتاب ... مش فإكر اسماء الكتب اللي العلمانيين نزلوها فيها ايه كفروا أوروبا كلها من النصرانية أول بس ما جابوا شوية ابحاث وان عقائد النصرانية مسروقة من عقائد الهندوس وعقائد السيقوالعقائد النصرانية القديمة أوروبا كلها كفرت بالنصرانية كلها بقيت وز أوت ريلجن والعياذ بالله والاسلام كل الحرب دا عليه ، شوف العلمانيين طافحين الدم وطالع عنيهم وطالع روحهم وقتوات بيتصرف عليها مليارات وفي الآخر شوف الجوامع في مصر وشوف المساجد في مصر وانزلوا اقعدوا مع الشباب علي القهاوي في مصر وشوفوا تاثيرهم ضعيف ازاي وشوفوا تاثيرهم علي المجتمع ضعيف ازاي ، دين قوي بحق وحقيقي دين بحق وحقيقي في غاية القوة طب الطريق لليقين ايه يا رب " **وَلَا تُجَادِلُوا أَهْلَ الْكِتَابِ إِلَّا بِالَّتِي هِيَ أَحْسَنُ إِلَّا الَّذِينَ ظَلَمُوا مِنْهُمْ** " اللي عادوكم بقي وحاربوا دينكم وطعنوا في دينكم الاية اللي بعدها " **وَكَذَلِكَ أَنْزَلْنَا إِلَيْكَ الْكِتَابَ** " كذلك بالتي هي أحسن عايز تعلم كل حاجة في الاية حاجه كل ما تجرى عليها تجرى منك فهو بيجرى علي المضيع فإكر انه حياقي لذة ويلاقيها بتجرى منه مش هيكتشف انها وهم الا لما يموت لو السراب واقف في مكانه كان عرف انه سراب بعد شويه لأن هو مكتشفش عشان كذا سمي سراب لانه بيفضل يخدعك بتسربوا من بين يديك لحد لما تموت وأنت منتش عارف انه كان سراب وانك بتجرى وراء سراب يعني قضية خطيرة جدا قضية الشبهات الخطيرة اللي أحنا عائشين فيها يا جماعة يا اخوانا الشباب دلوقتي عائشين في فرن الشبهات يعني أنا بقولكم مجموعه من الشبهات وكان نفسي أرد علي الشبهات كتير ونمسك

شبهات من دى ونفضل نسترسل فيها إنما للأسف الشديد ده بقى حرب مسعورة كآني ناس الدين الاسلامى ده أكبر دليل على إنه دين حق إن كل الشبهات ده 1400 سنه ليل نهار متواصل من أول **"لا تجادلوا هذا الكتاب إلا بالتي هي أحسن"** ودين موقعش ده نصرانيه فى أوربا مستحتملتش خمس ست كتب العلمانية نزلتهم كتاب(.....) مش فاكرا أسماء الكتب اللي العلمانيين نزلوه من حوالى قرن من الزمان كفروا أوربا كلها من النصرانيه كفروها أول ما بس جابو شوية اباحت وإن العقائد النصرانيه مسروقه من العقائد الهندوز وعقائد الزيغ وعقائد الفرعونيه القديمه وبدأوا يقولوا الكلام ده أوربا كلها كفرت بالنصرانيه كلها بقت ما فيش دين والعياذ بالله فالإسلام كل الحرب الجباره شوفوا العلمانيين طفحين الدم وطالع عينهم وطالع روحهم وقنوات اتسرف عليها مليارات وفي الآخر شوفوا الجوامع فى مصر وشوفوا المساجد فى مصر وانزلوا اقعدا مع الشباب فى قهاوى فى مصر وشوفوا تأثيرهم ضعيف إزاي وشوفوا تأثيرهم فى مجتمع ضعيف جدا إزاي دين قوى بحق وحقيقى فى غاية القوه طيب الطريق لليقين ايه يارب **"لا تجادلوا أهل الكتاب إلا بالتي هي أحسن إلا الذين ظلموا منهم"** إلا عدوكم يبقى واللى حاربوا دينكم وطعنوا فى دينكم والآيه اللي بعدها **"وكذلك أنزلنا إليك الكتاب"** كذلك بالتي هي احسن عايز تتعلم كل حاجه فى الايات اتعلمها من القرآن أنا عايزكم ياجماعه تاخذو بالكم من ملاحظه غريبه فى الآيات اللي أنا حقولها دى

آيه اللي أنا بشرح فيها من ساعتها **"ولا تجادلوا أهل الكتاب إلا بالتي هي أحسن"** يبقى بتتكلم عن القرآن

طب آيه **"47 وكذلك أنزلنا إليك الكتاب"** بتتكلم عن القرآن **"فالذين ءاتيناهم الكتاب يؤمنون به ومن هاؤلاء من يؤمن به وما يجحد باياتنا إلا الكافرون"**

طب آيه **"48 وما كنت تتلوا من قبله من كتاب ولا تخطه بيمينك إذا لارتاب المبطلون"**

طب آيه **"49 بل هو ءايات بينات فى صدور الذين أوتوا العلم وما يجحد باياتنا إلا الظالمون"** بتتكلم عن القرآن

طب آيه **"50 وقالوا لولا أنزل عليه ءايات من ربه قل إنما الآيات عند الله وإنما أنا نذير مبين"** بينذر بالقرآن ولآيات يتاعت ربنا بتتكلم عن القرآن

طب آيه **"51 أولم يكفهم أنا أنزلنا عليك الكتاب يتلى عليهم فى ذلك لرحمة وذكرى لقوم يؤمنون"** هو القرآن مش كفايه يبقى مصدر نور مش كفايه يبقى مصدر يقين مش كفايع يبقى دليل على صدق الدعوة يبقى بتتكلم عن القرآن

طب آيه **"52 قل كفى بالله بينى وبينكم شهيدا يعلم ما فى السماوات والارض والذين ءامنوا بالباطل وكفروا بالله أولاءئك هم الخاسرون"** علاقة الذين أعرضوا عن القرآن يعنى الصفحه كلها اللي بتتناول قضية الشبهات تتحدث عن القرآن بتتكلم عن القرآن يبقى الطريق لليقين يبقى القرآن يبقى لو أنتى عايزة يقين لو أنت عايز يقين الراسخ إفروا القرآن صح ياجماعه أنتم قلوبكم تتلمى يقين يهد الجبال تزول الجبال ولا يزول العلاقه بالقرآن اه لو القرآن دخل حياتنا قضيه محزنه والله ياجماعه قضيه محزنه قوى اه لو القرآن دخل فى حياتنا اه لو الكتاب ده هو دخل فى حياتنا ياجماعه اه لو النور ده دخل فى حياتنا

لما يبقى سورة المدثر أولها **"يا أيها المدثر"** الدثور اللبس الفخم اللي النبى لبسه قبل البعثه وأخرها منظر واحد لابس لبس فخم واللبس الفخم ده مينفعس مع الدعوة ده عايز كحرتة ورايح وجاى وتضحيه ومتبهدل ده يكسفك وده يعرض عنك مش عايزة حياة الفخامه والرفاهيه اللي النبى بعضها كان يعيش فيه قبل البعثه وفى آخر السورة المدثر **"كانهم حمر مستنفرة فرت من قسورة"** قسوره معناها أسد النبى أسد نازل فى دعوه إلى الله مبيهش حد ولا يخاف من حد شوفوا الأسد لو بيتهاجم على بيت واحد بيخاف منهم أو يهابهم ولا يهتمو النبى نازل مش مكسوف من حد مش خايف من حد لما تقارن أول المدثر بأخرها ايه نقله دى الرهيبه ده سبب ايه سبب القرآن

طيب أول المزمّل " يا أيها المزمّل " النبي ملفوف ببطانيه النبي نائم عليه السلام آخرها " إن ربك يعلم أنك تقوم أدنى من ثلثي الليل " ايه نقله المهوله من أول السوره وأخرها بسبب القرآن عشان كده " وإذا إبتلى إبراهيم ربه بكلمات فاتمهن " " قال إني جاعلك للناس إماما " زى ما القرآن كلمات ربنا إبتلى إبراهيم بكلمات لما أتمها بقى إمام يعنى كلمات القرآن طريق الإمامه اللي حيرتبط بالقرآن حيبقى إمام " قل أوحى إلى أنه استمع نقر من الجن فقالوا أنا سمعنا قرءأنا عجباً " يهدى إلى الرشد لو القرآن دخل دعوتنا حياة الشباب حتتقلب وحياة البنات حتتقلب لو القرآن دخل حياتنا حنقى مشروع الإمامه فى دين لو القرآن دخل حياتك وحياتك حيقب عزيمتك وحيقب النور بتاع حياتك

يعنى كنا مع هذا اللقاء فى تدبيرات ووقفات مع سورة العنكبوت إن شاء الله بإذن الله باقى صفحه ونص فى سورة العنكبوت بإذن الله يعنى اللهم لك الحمد يعنى أحنا كده خلصنا كام صحه لحد دلوقتى 6 صفحات ونص بفضل الله فاضل صفحه ونص فى سورة العنكبوت ونبقى خلصنا هذه الدور ونعمل الامتحان عليها دورة خط أولى إلتزام أو دورة موسوعة مشاكل المتزيمين والمتزيمات

ربنا يسددكم وربنا يبارك فيكم سواء إخواننا وأخوتنا معاننا على الغرفه الصوتيه فى الموقع الطريق إلى الله طلبه وطالبات المعهد القرآنى الدعوى أو عموما شبابنا اللي معاننا على البث المباشر اليوتيوب إن كان معلىش بنعتذر لكم إن كان نزلنا الرابط قبلها بدقيقه أونص دقيقه لأن الرابط اللي قبلها مش هو الرابط اللي كان فعلا حتدخلوا عليه معلىش ياجماعه إن شاء الله بإذن الله فى البث المباشر بعده إن شاء الله ميوقعش مننا حاجه ربنا يسددكم ربنا يبارك فيكم ربنا يحفظكم كان نفسي نتواصل مع بعض على اليوتيوب بس مباشر بعد ما أخلص ولكن فاعليا حيبقى صعب انهارداه لكن خلال أيام وأنا فى عمره التربيه أربعه اعمل بث مباشر من اليوتيوب من مكه أو المدينه بإذن الله سبحانه وتعالى مكنش ببقى أول ما أرجع من العمره نعمل هذا البث مره أخرى

أسأل الله سبحانه وتعالى أن يهدينا وأن يسددنا وأن يفقهنا فى القرآن وأن يجعلنا من أهل القرآن الذين هم أهل الله وخاصته
إنك ولى ذلك والقادر عليه
سبحاتك اللهم بحمدك أشهد أن لا إله الا أنت أستغفرك وأتوب إليك
وجزاكم الله خير

تم بحمد الله

شاهدوا الدرس للنشر على النت فى قسم تفريغ الدروس فى منتديات الطريق إلى الله وتفضلوا هنا:

<http://forums.way2allah.com/forumdisplay.php?f=36>